



# Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma : Tir Yimiyim

tiryimiyim@aolima

tir yimiyim

TAPAK 10



Suu Kyi temang majungbayong ken o jembidak shilem magitet

Medvedev-i Djokovic tsükdakja US Open kokogo



VOL. XVIII NO. 332 (ADOK 332) DIMAPUR

SANGTENNÜ (TUESDAY)

RONGJUI (SEPTEMBER) 14, 2021 ₹ 5.00

## Dimapur nungi pur aoba tanur ka Karbi Anglong nung kümzük



September 10, 2021 nü Dimapur kübok Purana bazaar nungi arishi küm 3 tain tanur ka pur aoertem angur.

**Dimapur, September 13, 2021 (TYO):** September 10, 2021 nü Dimapur kübok Purana bazaar nungi mejangjatetba nisung kari arishi küm 3 tanur tebur ka pur aoba September 12 anepdang kümzükogo.

Yashinep 2:00 ako meta Assam kübok Mongsing Teron village, Khatkhati nung tanubosangji kümzük, ta police-i ashi.

Iba dak sendakba nung Dimapur police-i nisung pungu puogo aser parnokji Dilwar Hussan (21), Jiboraj Mech (26), Rahul Narzary (24), Vikram Singh (21) aser Yasim Ali (32) nunger ta jangjaogo.

"September 10 aonung 8:00 ako meta tanubosang pur aoertemi par tsüraburtem dang phone ajanga sen lakh 15 meshi. Parnokisa tsüraburtem dang police nem osang agütsüra tanubosang yirutsütsü ta amokmeren" ta Dy. Commissioner of Police Dimapur Zone-I, Dr Naieem Mustafa-i ashi.

Nisungpur aser tsüraburtem tsüingda sen atema jembitep aser

tatem nung sen lakh 10 agütsütsü molungtep. Senji September 12 anepdang 10:00 ako nung agütsütsü jembitep. Tsüraburtemi police nem tanur pur aoba osang agütsür liasü aser iba mapang police-i parnok tsüingsü tebushidak liasü aser sen magütsüdag parnok apu, ta Dr Naieem-isa ashi.

Police-i Karbi Anglong district kübok Mongsing Teron yim nung tanubosang kümzük aser iba mapangji pa pur aoer ka apu.

Parnoki asüingdangtepa aodang tanubosanger kidanger Jiboraj Mech ta ser nisung kati iba tasa ya atonga inyakba angazük. Mech ya electrical dokan ka nung inyaker aser Purana bazaar nung par kidang lia apu.

Nisungpurtemi iba mapa inyakba nung amshitsü atema activated SIM card ka den mobile phone tasen ka ali, ta police-isa ashi.

Parnok ajak IPC kübok tai tongloktsüogogo aser East Police station nung FIR ka benokogo, ta police-isa shisem.

## NCD-i tanur pur aoba aitsür; DCCI pusemer

**Dimapur, September 13, 2021 (TYO):** Dimapur nung telungpur telok kar aser Bangladesh nungeri özüng alema mapa inyaka arur. Parnoki nisung pur aoba, tashiyim agi shi nung medemba, auyaba, tax talitabung meshiba aser tanga balala inyaker, ta Naga Council Dimapur (NCD)-i tanü sangdong ka nung metetdaksü.

"September 10, 2021 nü arishi küm 3 tanur ka pur aoba khukhua aitsür aser September 12 nü Dimapur Police-i mapang shitak nung tanubosang kümzükba atema tenüngsang agütsür. Özüng amertemi aibelenertem nem tapet temerenshi agütsütsü akhanger" ta NCD-isa metetdaksüogogo.

"Külen, Dimapur Chamber of Commerce & Industry (DCCI)-i September 16, 2021 nü dokan

aser shishilembadak ajak shibangtsü ayongba nung NCD-isa pusema nungiter. Nagaland nung telungpur teloktem aser sorkar agencies ajanga tax aser tashiyim agi sen saruba ajanga loktiliba menentsüogogo" ta NCD President Etsungmomo Kikon aser Genreal Secretary Thsapongkyu Sangtam nati sangdong nung ashi.

"Özüng memelaba tax saruba ajanga shishilembartem aser public timtemer aser iba inyakyim sempar. Iba inyakyim ajanga shishilembartem timtemer aser tatem nung consumers-i khuretji abener. Anungji nisung ajaki iba inyakyim anema ola adoktsüla aser asen loktiliba nung temelenshi bener arutsü asoshi inyaksü ayongzük" ta NCD-isa metetdaksü.

## CNCCI-i Sep 16 nü Nagaland nung shishilembadak ajak shibangtsü

**Dimapur, September 13, 2021 (TYO):** Confederation of Nagaland Chamber of Commerce and Industry (CNCCI)-i September 16, 2021 nung Nagaland ajungalen shishilembadak shibangtsü osang metetdaksüogogo.

"NPGs aser Government agencies-i tax talitabung saruba anema DCCI-i dokan aser shishilembadak shibangtsü ayonga nung CNCCI-isa pusema nungiter" ta Chairman Dr.

Khekugha Muru aser General Secretary Dr. Seyevilie-i sangdong ka nung ashi.

CNCCI-i Nagaland Chief Secretary dang NPGs ajanga tax talitabung saruba anendaksütsü aser 'One Nation One Tax' kübok GST inyakyim nung adenba items nung Civic Bodies-i tax/ fees saruba agentsü atema takhangba agütsüogogo.

CNCCI-isa SARFAESI Act mapa küma tenzüktsü aser Municipal aser Ad-hoc town

Council nung shishilembartem asoshi menden lezmüksütsü takhangba agütsü, saka sorkar nungi telangzüba kecha maliba ajanga Nagaland ajungalen shishilembadak shibangtsü ayongzük" ta mendenpurtemi ashi.

Anogo ka shibangba sülen-a sorkar nungi telangzüba kecha melira CNCCI-i lungkak aitba mapa tuluba inyaksü. Iba nung public-ia pusema nungittsü ayongzük, ta CNCCI-isa metetdaksü.

## COVID-19 Nagaland: 56 taneptsü angu, 27 dak putet & 6 asü

**Kohima, September 13, 2021 (TYO):** Nagaland nung tanü agi anogo pungububa atema COVID-19 puteter dang nungibo taneptsü angur teimba liasü. Tanü nisung 56 taneptsü angu aser 27 dak putet.

"Tesüiba ghonda 24 tsüingda nisung 27 dak COVID-19 aliba putet. Parnokji Dimapur nung 12, Mon nung 5, Kohima nung 4 aser Mokokchung o Wokha nung asemsem (3) lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Kasa mapang Covid puteta

alir nisung 56 taneptsü angu. Parnokji Dimapur nung 19, Kohima nung 10, Mokokchung nung 9, Mon nung 8, Peren nung 7 aser Phek nung 3 lir" ta paisa ashi.

Nisung 30,657 nungi 28,495 taneptsü nguogo aser ibaji 92.94% lir. Tang nisung 580 anepaludar, ta Dr Kikon-isa ashi.

Tanü Dimapur nung COVID-19 puteta alir nisung 6 asü aser parnok züngsema tasür ajak agi nisung 645 kümogogo, ta paisa shisem.

"Deobar tashi nung nisung 669,988 nem COVID-19 vaccine

indang dose 927,350 agütsüogogo" ta State Immunization Officer, Dr Ritu Thurr-i metetdaksü.

Vaccine agirtemji frontline workers 60,859, healthcare workers 15,993, arishi küm 45 ser tempur 195,114 aser arishi küm 18 nungi 44 tsüingda alir 398,022 lir, ta paisa ashi.

"Vaccine agirtem rongnungi nisung 257,362-i dose anaprong agiogo. Parnokji frontline workers 45,338, healthcare workers 13,040, arishi küm 45 ser tempur 121,778 aser arishi küm 18 nungi 44 tsüingda alir 77,206 lir" ta Dr Thurr-isa ashi.

## Manipur & Nagaland nung vaccine delivery atema drones amshitsü melar

**Guwahati, September 13, 2021 (Agencies):** Ministry of Civil Aviation-i Hombarnü Indian Council of Medical Research (ICMR) asr Indian Institute of Technology (IIT), Bombay nem Drone Policy nungi talenba kar salatsüogogo.

Manipur, Nagaland aser Andaman and Nicobar Islands nung ICMR-i Beyond Visual

Line of Sight (BVLOS) vaccine delivery atema drones amshitsü temelaba agütsür. Iba ya azüklen 3,000 meters tashi atema lir, ta Ministry of Civil Aviation-i ashi.

Civil aviation ministry-isa tanga sangdong ka nung IIT Bombay nem research, development aser testing atema drones amshitsü temelaba

agütsü.

August 31 nü ICMR aser IIT Bombay rejutemi sorkar dang drones amshitsü atema temelaba meshia liasü.

ICMR aser IIT Bombay rejutemi Airports Authority of India (AAI) nungi airspace amshitsü atema temelaba meshitsü, ta ministry-isa metetdaksüogogo.

## NSCB ketdangsürtemi kongsang office 5 semdang

**Kohima, September 13, 2021 (TYO):** Nagaland State Cooperative Bank (NSCB) vice chairman Kekhewungulo Lea-i September 9 aser 10 anogotem bank indang kongsang pungu semdangogogo.

GM (Admn & Vigil) Ningsangwaba-i meina NSCB vice chairman Lea-i Tseminyu, Wokha, Mokokchung, Changtongya aser Tuli semdang.

Iba mapang NSCB ketdangsürtemi kongsang balala nungmapa inyakertem den ajurutepa sensaksem aser policy

shitak inyakba atema tenüngsang agütsü.

"Bank nung inyakertemi Development Action Plan takok ngua inyakba ajanga tajangzük bentsür aruogo. Iba ya mapa tulu ka inyaktetba lir aser zübazülema melii 2021-2022 nunga anasü agi teimba ajangzüktsü atema inyaksü ayongzük" ta Lea-i ashi.

Covid wara mapang bank nung mapa inyakertemi meranga inyakba atema tenüngsang agütsür. Board of Directors dena mapa inyaker ajaki alizüng yua aliba atongtsüsa inyaksü, ta paisa

ashi.

Bank inyakyim nung customers ya kanga tongtipang lir aser parnok dang yimya tajung sayutsüla aser osü tajung agi jembitsüla. Iba ajanga dang bank dangi customers atsür arutsü aser bank ajangzüktsü, ta NSCB vice chairman Lea-isa metetdaksü.

Paisa NSCB kongsangtem nung ketdangsürtem dang hopta shia mesüra hopta ana nung khenbo senden ayonga amentsü aser idangji tarutsü atema inyaka aotsü sentongtem atongtsü ashi.

## KYC updation tenüng amer ashioktsür: RBI

**Mumbai, September 13, 2021 (Agencies):** Hombarnü Reserve Bank of India (RBI)-i KYC updation tenüng amshia ashikülaker dang nungi jembua alitsü metetdaksüogogo.

Bank account alirtemi mejangjaba nisung mesüra teloktem nem account details mesüra passwords magütsütsü nenshia metetdaksür ta RBI-i ashi.

KYC updation tenüng nung

customers ashioktsüba osangtem onok dang aruogo. Ashikülakertemi calls, SMSes, emails ajanga customer dang account / login details/ card information, PIN, OTP amala meshir. Ano karibo KYC updation atema unauthorised/ unverified application kar enoktsü ashir" ta RBI-i metetdaksü.

Customer temi call/message/ unauthorised application ajanga

osang agütsüba sülen ashikülakertemi pa/la account lapokteter, ta RBI-isa ashi.

"Anungji customer temi login details, personal information, copies of KYC documents, card information, PIN, password, OTP amala tangar nem magütsütsü kümdangtsü metetdaksür. KYC updation amala osangtem arura pei indang bank nung oa osang metetpelang" ta parnokisa ashi.

## Mangkolemba SDPDB senden nung project balala indang jembia



September 10, 2021 nü Mangkolemba SDPDB senden nung Temjen Inna Along, Minister, Higher Education & Tribal Affairs aser Dr. Longrineken, Advisor, Treasuries & Account, National Highway nungertem noksa nung angur.

**Dimapur, Rongjui/Sept. 13 (TYO):** Mangkolemba nung ita shia amenba Sub Divisional Planning and Development Board (SDPDB) senden ya September ita atema Dobashi Court, Mangkolemba nung September 10, 2021 nü Dr. Longrineken, Advisor, Treasuries & Account, National Highway mendenpuba kübok mena liasü. Iba senden nung Temjen Inna Along, Minister, Higher Education & Tribal Affairs dena liasü.

Iba senden nung taoba SDPDB senden nung lemtetbatem khien lepa reprangshia liasü.

Iba senden nung Mangkolemba Sub-Division ya full-fledged district kumdaktsütaü, Nokpu yimdam Tribal Affairs department kübok guest house yanglutsü jembia liasü. Parnoki Medemmera Women Multipurpose Society Mangkolemba registration asütsü atema, Mangkolemba nung power supply tajungba kumdaktsütsü aser jila nung

street lighting inoktsü indanga jembia liasü.

Maneni SDPDB senden nung mozüki aser COVID-19 osang agitep, Mangkolemba-Longnak lenmang yanglushitsü aser JNV Longnak den sendaktepba lenmang yanglushitsü atema jembia, Mangkolemba nung Fire & Emergency Service amenoktsü aser SDEO Office, Mangkolemba nung metzü meshiba tesem yanglutsü atema senden nung jembia liasü.

## Noklak nung metsüjangnatsü alemba sentong ka agi



**Dimapur, Rongjui/Sept. 13 (TYO):** NEC aser MIDH 2021-22 kübok Department of Horticulture, Noklak ajanga metsüjangnatsü alemba sentong ka September 10, 2021 nü DHO, Noklak indang office nung ayongzüka liasü.

Iba sentong nung jembiba mapang, district nung iba ama sentong mezüngbuba ayongzüka asoshi SDO (Civil) C. Phuniang-i sorkar aser department dang pelaba lemsatepa liasü.

Iba sentong ya ajanga district nung aluyimertem kanga

ajangzüksü tamang akar, ta pai ashi.

Pai iba sentong nungi tajangzüik anguba aluyimertem dang parnoki züsentetba nungi market nunga kongshitsüsa meranga inyaksü ayongzüka liasü.

Aluyimba yimya ana lir, ka akhi mapang nungi inyaka aruba yimya aser ka tanü-asüing yimya nung inyakba, aser pai aluyimer dang district nung rongsen tajemba indoka tajangzüik tali anguba yimya amshitsü ayongzüik.

Danga state tem nungi

aonsotsü alitsü ya tim masü, kechiaser yangi timba aluyimer lir, ta pai ashi.

District Horticulture Officer, Noklak, Tiakaba Longchar ajanga aluyimer dang metsüjangnatsü kanga kumdanga amshitsü ashi aser aibelener nem temerenshi agütsütsü, ta shia liasü.

Item metsüjangnatsü amshiba reprangtsü, ta pai ashi.

North East Council (NEC) (post COVID-19 economic recovery) kübok district nung Vegetable village trok lir, aser itemji Noklak, Nokyan B, Yokao, Panso A, Sanglao aser Chiliso alitsü, ta pai sangdong, kong metsüjangnatsü lema agütsü.

Ajidang masü, MIDH 2021-22 kübok Vegetables village pongu - Noklak, Nokyan, Yokao, Choklangan aser Kingjung nunga metsüjangnatsü lema agüja liasü.

DPO Noklak, Meren Jamir-ia iba sentong nung aluyimer ajungshia liasü.



Assam-Nagaland sentaktepba Longchem - Naganijan lenmang department-i junga anepaluba masüba agi tesem aika nung gari satema mesenzüteti rakar aliba ajanga anasa alir gari akartem den dokan kibur aser temulungertem nübu aser rongsen tenlatepa lenmang majung dak yanglushia amungba noksa nung angur. Mokokchung, 13th September, 2021 (Photo Courtesy: I. Meren Walling (Nokpu yim))

## Nagaland Police Retired Officers Association pur senden amen

**Dimapur, Rongjui/Sept. 13 (TYO):** Nagaland Police Retired Officers Association (NPROA) executive pur senden ka Police Officers' Mess, Chumukedima, Dimapur nung September 10, 2021 nü mena General Conference ya October 25, 2021 anüingdang 11:00 ako nungi alitsü lemteta liasü.

Iba mungdang mapang

Inspector nungi tema Police Officer mapa nungi anisüngzüka alir ajunga arua tenüing zülüoktsü metetdaksü.

Maneni iba mungdang dak sendakba osangtsüsangtem osangkaket ajanga sangdongtsü aser office den tongtepratepner temi NPROA tongti zülurm Chaya Angami den +919612177166 ajanga jembitsü akok, ta sangdong ka ajanga ashi.

## Chief Minister ajanga committee balala senden ayonger

**Dimapur, Rongjui/Sept. 10 (TYO):** Chief Minister Neiphiu Rio ajanga Assembly's Select Committee to Examine the Nagaland-Assam Border Issue aser Select Committee on SARFAESI Act, 2002 indang senden September 14, 2021 anepdang 10:00 ako aser 11:30

ako nung Nagaland Legislative Assembly Secretariat, Kohima nung aliba Committee Room nung jatepa lir.

Selected Committees indang züngsem ajunga iba senden nung arua adentsü metetdaksür, ta sangdong ajanga ashi.

## 'Mopungchuket Orthodox Tea' ta sür süngo jok brand tasen ka yanglu tenzüko



MCCI tir, Tsukti Longkumer (achichi)-i 'Mopungchuket Orthodox Tea' ta sür süngo jok brand tasen ka yangi Mokokchung nung tenzüksüba mapang MOT kibur Imsusunep Jamir densema angur. Mokokchung, September 13 (Courtesy: Limalenden Longkumer)

**Mokokchung, 13 Sept (TYO):** Liso nisungi züsenteta yangluba 'Mopungchuket Orthodox Tea' ta sür süngo jok brand tasen ka Sept 13 nü Mokokchung Chamber of Commerce & Industry (MCCI) tir, Tsukti Longkumer-i tenzüksüo. Iba mapa ya lanur business inyaker Imsusunep Jamir-i Mopungchuket yimdam par süngo lu nungi agizüka süngo jok ji yanglu.

Süngo tu (tea leaves)-ji 100% mozü minoki teka agidang yangluba lir. Süngo jok jenjangji 100 grams packet ka nung senpak 75/- . 'Mopungchuket Orthodox Tea' ya Mokokchung nung - Tea Hub, A3 Provision Store aser Mixed Bag dokan-tem nung talitsü angutsü.

Market-ji meilongi tuluba kumdaktsütsü aser süngo jok maparenjia teimba/tuluba moraloka aser bendenloka aotsü tebilemba lir, ta Imsusunep Jamir-i metetdaksü.

Kari danga iba dak sentakba nung osang tejangja metetnüra iba number - 9863428546 ajanga Imsusunep Jamir den jembitetsü. Pa ya Kohima nung alir saka tangji business atema par yim Mopungchuket-i arua süngo jok yangluba maparen nung toklanga inyaker.

Entrepreneur aser MCCI tir, Tsukti Longkumer-i Imsusunep Jamir nem iba mapa tenzüktetba asoshi tenüingsang agütsü aser and business maparen balala nung ajungshitepa yariteptsü mulunga aliba lemsatep.

## New Jalukie nung Assam Rifles temi medical camp katsü

**Dimapur, Rongjui/Sept. 13 (TYO):** HQ IGAR (North) kübok Assam Rifles, Jalukie Battalion ajanga Peren district kübok New Jalukie nung Child Care Orphanage nung aliba tanurtem aser ano nüburtem asoshi angati temang reprangba den COVID-19 Awareness Drive sentong ka September 12, 2021 nü ayongzüka katsü.

Iba sentong nung medical team ajanga nüburtem aser tanurtem temang repranga mozü aser danga COVID-19 dak sendakba teyari agüja liasü.

Iba camp nung yimdamkir tebur 25, tetsür 30 aser tanur 30 nem medical teyari balala agüja iba sentong takok nung agia liasü, ta sangdong ka ajanga ashi.

# Assam nung shisaliok reju tenet amenoktsü

**Guwahati, September 13, 2021 (Agencies):** Assam nung Van Dhan Vikas Kendra 400, tribal food park 5 aser Eklavya Model Residential School amenoktsü asoshi State Sorkari teletmetba agiogo.

Assam chief minister Himanta Biswa Sarma den Union tribal affairs minister Arjun Munda nati tang agia aliba Tribal Livelihood Development Programme asadangshia liasü, koba State nung tribal nüburtem ajangzükdaksütsü aser renlokdaksütsü asoshi iba sentong agir.

Deobarnü Guwahati kübok State Guest House, Koinadhora nung Tribal Livelihood Development Programme indang senden agia liasü.

Iba senden nung, TRIFED indang managing director, Pravir Krishna-i tang tagidak aliba sentong tem aser state nung amenoktsü asoshi asalentong yangluba project tem mapa küma inyaka aotsü asoshi telok dang metetpeladaksü.

Chief minister Sarma-i, terenlok atema Ato Kilonser indang mangdang den jangyumedema, tribal kin tem densema lenla ajunga nung nübur ajak ajangzüktsü atema Assam sorkari project balala inyaksü sentong lir, ta ashi.

TRIFED MD Pravir

Krishna ajanga Assam nung Van Dhan Vikas Kendras (VDVK) tasentem lapoktsü asoshi asalentongtem yangluba nung ajemdaker, Assam CM-i, sangküm March tsüingda tashi nung Kendra 400 shi amenoktsü asoshi nungdakba meratem agitsüla, ta telok ajungshia liasü.

Assam CM-i ashiba agi, iba project mapang shitak nung renemtsü asoshi mapang shia maparentem asadangshitsü, ta ashi.

Lisopurtem temi yanglutetba/inyaktetba, tribal nüburtem maparen ajungkettsütsü aser tribal product tem yoktettsüsa maparen ulushitsütsü nükjidong nung, State Sorkari VDVKs indang product tem jenjang tajemba nung alizüktsü, ta Sarma-isa ashi.

"TRIFOOD" ta nungja agütsüba Tribal food park pungo atema state sorkari TRIFED nungita yaritsü ta CM-i nangzükogo. Item park ajanga tribal temi yanglutetba chiyongtsü jenjang tajungba kümtsütsü.

Assam nung Eklavya Model Residential Schools talila tenet amenoktsü asoshi nungdakba ali kimung agütsütsü atema Sarma-i tim state sorkar department dang tetuyuba agütsüogo.

Tang, Assam State nung Eklavya Model Residential

Schools pungo shi teyangludak lir.

Union tribal affairs minister Arjun Munda-i item project indang maparen asadangshiba mapang pai, tribal nüburtem rongsenketzung tsütsü renlokdaksütsü nükjidong nung item scheme mapa küma takok ngua inyaksü asoshi centre sorkari nungdakba teyari ajanga nungittar, ta ashi.

Northeast tesem renlokdaksütsü asoshi Ato Kilonser nükla tulu lir aser iba nung anidaka tribal lanurtem nem mapa agütsütsü aser entrepreneurship tsütsü renlokdaksütsü asoshi ministry ajanga mapatong balala achaayanga inyakdar, ta Arjun-i ashi.

Iba den bendenloksema, taruba küm pungo nung centre sorkar ajanga Assam nung model village balala amenoktsü sentong lir, ta pai metetdaksü.

Maneni, iba senden nung, Union minister-isa State brand "TRISSAM" nem Van Dhan National Award agütsü, koba chief minister Sarma-i agizüka liasü.

Iba sentong nung, P&RD minister Ranjeet Kumar Dass, agriculture minister Atul Bora, handloom & textiles minister UG Brahma, environment & forest minister Parimal Suklabaidya aser education minister Dr Ranoj Pegu nung denogo.



Assam Police-i yashi Tinkopani Reserve forest, Tinsukia District nung ULFA (I) tetsür züingsem ka apu. Osang tejangja ka angazükba nung ajemdaker parnok mita aodang Tinkopani reserve forest nung tetsür telungpur apu aser la ket nungi Rs 19,130 ngutet.

**GOVERNMENT OF NAGALAND**  
**DIRECTORATE OF INDUSTRIES & COMMERCE**  
e.mail: [industryntaga@gmail.com](mailto:industryntaga@gmail.com), e-fax: 08468825666

**ADVERTISEMENT**

**Dated Kohima, the Sept. 2021**

NO.IND/TRG/H-LOOM/87/90-91 (Vol-II) : Applications are hereby invited from indigenous candidates of Nagaland between the age of 15-23 years as on 16-07-2021 and upto 25 years in case of St/SC candidates with a minimum qualifications of HSLC/HSSLC/SSLC or equivalent examination passed in a single sitting with English as a subject for undergoing 3(three) years Diploma Course in Handloom & Textile Technology commencing from 1st October 2021 at the Indian Institute of Handloom Technology, Jawahar Nagar, Khanapara, Guwahati.

Necessary detailed information and prescribed application forms may be collected from the office of the Directorate of Industries & Commerce ( Dev. Branch, First floor), Nagaland, Kohima during the office hours. The last date for submission of form is on or before 24th September 2021. No separate calling letter will be issued.

(K.HokisheAssumi)

**Director of Industries & Commerce**  
**Issued by DIPR.**

# Guwahati police-i Myanmar nung 26 apu



Guwahati police-i Myanmar nung 26 apu noksa nung angur.

**Guwahati, September 13, 2021 (Agencies):** Myanmar kübok district balala nungi temelaba tejangja melii arrtsü adena India-i aruba atema Deobarnü Guwahati police-i Myanmar nung nisung 26 puogo.

Guwahati kübok Paltan Bazar nung hotel ka nungi Myanmar nung ya apu aser parnok Delhi aotsü sentong renemer liasü.

Police-i ashiba agi, parnok ket nungi Mizoram address agütsür aliba Aadhaar card aser Indian voter registration cards ngutet.

Myanmar nung ket nung tiyazü Aadhar card bener aliba ajanga ozüing alema Assam-i aitba temai adokogo.

Item bendanger ket nunga tiyazü indang United Nations High Commissioner for Refugees (UNHCR) ID card bena lir ta temolung meleme bilemer.

Taküm June ita, Government Railway Police (GRP)-i Guwahati nung tanur ka tetsür aser densema Rohingya refugee 9 apu.

Parnok (Rohingya refugee)

ket nunga United Nations High Commissioner for Refugees (UNHCR) ID card taila bena lir ama temolung meleme bilemer.

Foreigners Act 1946, R/W Sec 3/4 Passport (entry into India) Act 1920, R/W Sec 6 off passport (entry into India) rules 1950 indang section 468 IPC R/W Sec 14 kübok Myanmar nung 26 anema Paltan Bazar police station nung ken o (case no.860/2021) ka benokogo.

Guwahati Police-i pua alirtem ya Myanmar nung Chin state kübok Falam district nung alir Biak Lion Ceu (28), Henry Vanhubik (20), Van Ceu Lian (21), Than Fel (20), Lal Kim Lian (19), Kei Than Hrang (23), Van Eng Lian (18), Van Uk Lian (21), Biak Nei Iang (19), Lal Cei Mawi (22), Len Mawi (28), Biak Hnem Par (18), Lal Cer Par (18) aser Van Biak Cuai (24); Hakha district nungi Nuam Ngaih Kham (25), Sut Khan Kim (27), Dai Sian Nem (27), Din Lan Cing (23), Cing Thawh Siam (20); aser Sagaing district nungi Kam Sian Lian (27), Thang Sian Muang (25) nung ta jangjaogo.

# Mizoram nung nisung 541 dak Covid 19 putet

**Aizawl, September 13, 2021 (Agencies):** Hombarnü Mizoram nung nisung 541 dak Covid 19 putet aser parnok züingsema nisung ajak agi 71,381 kümogo, ta health department ketdangsür kati ashi.

Yashi den medemdangra nisung 548 agi tanü Covid-19 tasen puteter tajemba asütsü, ta pai ashi.

Tesüiba ghonda 24 nung iba wara ajanga Mizoram nung nisung ana asü aser tena züingsema tasür 238 kümogo.

Tashidak tasen puteter rongnung tanur 123 dena lir aser parnok ajak pei pei aliba tesem nung iba wara menatet. Parnok 541 rongnung, nisung 379 shi iba wara temaitsü agi

shirangdar, ta pai ashi.

Tang Mizoram nung nisung 12,396 shi Covid agi shirangdar aser Deobarnü nisung 572 densema iba tashidak puteter nisung 58,747 shi taneptsü nguogo.

State nung Covid-19 wara nungi taneptsü angur shilem 82.30% aser tasüba shilem 0.33% asütsü. Mizoram nung iba wara adoker külen nungi sample lakh 9.65 shi tendangogo.

"Honibarnü tashi State nung nisung lakh 6.63 shi nem Covid-19 vaccine agütsüogo aser parnok rongnung nisung lakh 2.98 nem dose anaprongla agütsüogo" ta State immunisation officer Dr. Lalzawmi-i ashi.



## TIR YIMYIM YIMOBILEM (EDITORIAL)

DIMAPUR SANGTENNÜ, RONGJUI(SEPTMBER) 14, 2021

### Aremer maremtet ola adoker

**D**imapur nung shishilembar telongjem, Dimapur Chamber of Commerce & Industries teloki saru agütsür magütsübo timtemba metetdakja tan hopta Yangtepnü September 16 anogo nung dokan kata melapoki longkak aita amongtsü telemtetba agiba yagi, Nagaland kanga mejungi shirangdagi ta metetdaksür. Dokan amener ka atema kenü dokan shibangtsübaji takoksa tulu, saka parnok takoksaji Nagaland yanglushitsü asoshi tenla ka ama kümer, parnoki takoksa arema kenü longkak aita amongtsü lemtetbaji, joko, saru onsara tali saruba agi parnok takoksa aser timtem anguba aremer maremtet alima nem metetdaksütsüsa ola adokba sentong ka lir. Atangji, ibai state government den jembiba oshi ka lir. Aiben state government den ajurutepa jembiba onüktem mapa kuma mataloker aser tezüluba nung agütsü nunga kecha mapa makümer. Iba jagi, Dimapur nung business inyakertemi tangbo tajurua majuruteptsü aser tezülua mezülutsü saka ola madoki shishilembadak aser mapa inyakdak ajak shibanga yur kidang longkak aita amongtsü telemtetba agibaji kangasa tezü atangba mapa aser oshi ka asütsü. Tangbo akhidang amato masü osettsüset, chiyongtsü aser tax meshitsüba maparen ajak nung, bener marudangyongi oset alidak agüja adoker, anungji state asoshi kechi tangutsü shilem lir, iba shilemji idakji meshiadoker aser iba senji indangindanga state government senpongi arur. Iba jagi asernoki Goods & Service Tax (GST) indang jembir. Joko, iba ama alimelen aser saru ajak arua matongdangyongi agüjadoker asünungji, state o state na tsüngda saru sarutsü atema check gate menügdaker, anungji mayutsü asoshia center government-i metetdaksüogo. Ajisüaka, asenokbo tanga check gate yanglutsü jangrar aser check gate anütsü rakteper. Nagaland timtemba tashidak poktetdakji aji lir. Iba ama inyaksangshiji reprangnura, Nagaland State Welcome gate nung minute ter-metsüka tanemi repranga nokdang nung angutsü. Asen lima süngküm nungbo Welcome zülua lir saka ait mait ka telok balalai saru tapu balala indang sen magütsüdagangyongi slip shizüka agütsür aser ano tesarur karibo slip-a magütsür. Item sarutemji linük tenzükertem telok balala saru den süngküm anükertemi anir department tapu balala tenung nung sarur. Aji oda, asenok Nagaland gate yabo 'Welcome gate' masü saka Tax Collection gate-ang kumogo. Tanga state nungbo lenmang aser apu yanglurtemi "toll tax" meshir aser iba sen jagi ano nübortem asoshi lenmang aser aputemji kodanga mejungi mekümdaksüi anepalur. Ajisüaka, asenok state nungbo mashikoshi, lenmang yanglurtemi masü saka telong aser tema nung alir telok balalai Nagaland Welcome gate atena aitba gari ajak dang sen meshir aser iba senji kongi aoar memetetter. Iba jagi, tangbo, Nagaland nung alirtem atema Dimapuri chiyongtsü aser osettsüset abenba gari arurtem Nagaland Welcome gate ajanga maitdang, Khatkati nung anenadoker aser yangji khu ajakji godown nung oshizüka yutsür meyipa aoer. Aji oda, tangbo Khatkati ya Nagaland godown kumogo. Item ajak ya Nagaland nung opposition dang masü saka government dena mali ama akümba tamaisü lir, kechiyong anogo shia nübortem shishilembadak aser state süngkümtem nung saru sarur telok telok ket nung timtem aser takoksa ajurur, saka item mapatemji nokdangtsüsa aser azüoktsüsa tashi aketba yimten mali, anungji tashi dak maka, nübortem asüktemer. Külen Naga nung yimten nüchiso indang jembir aser külen yimten nüchiso bushir telok tenung nung telok teloki saru saruba anema nübortembo longkak aiter ta asüba tia ya Naga nung asoshi, ano, mapang tamajungtiba ka ajurur asütsü. Ibai dang masü saka ano külen state government-i telok balalai saru saruba anema ola madoker aser government mapa nungbo 'commission' agiba sobaliba agi Nagaland merenloktet kangshir ta asüba anogotem ya süitem matateter, anungji yaktasa süitemdaksüner aser lanurtemi timi ketdangtsüba mapang ka ajuruner.

## OLEMSABANG

### Khristan Tamang den Sobaliba Liromedem

~ Ayutemjen

(Yashi adok nungi...)

**Oshi:** Tanü tendak asen Aori Ao o mejembitetbaji konang ama bilemer. Lanur aikati pei oshi mashiba agi pei lokti nungi atsüngzükbaji angur. Pei kin tekülem kidangi maobaji oshi tetsükdaksü aliba ajanga ta kuli lir. Yimer rongnungbo tashir, tangateter aser takar ka, pa pei yimtaki arua yim mungdang nung Nagamese agi jembiba ya konang masü. Anungji tsüraburi anir pei kidang asen o jembitsüla aser tanur nem ibaji angazükdaksütsüla. Ibai rongdak teinyaktsüka kumogo, aji ta mesüra asen oshi samatsü ana nung lir.

**Sobusolem:** Sobusolem ya temang lema yutsüsü aben süoshi ka dang masü, saka sobutsü ajanga kin ka ayak aser kidong ka jakzüka aruba sayur. Anungji alima kin ajaki pei süoshi awzüka ayur.

Thailand nung every Thursday Office nung inyaker ajak traditional dress agir. Bhutan nung office nung inyaker (school uniforma dena) ajaki traditional dress agir. Public nungdak balala atema tular ajurui aodang traditional dress agir dang aor. Taiwan nung indigenous Pastori sayutsüngidang traditional dress agir, yamaji alima aika nung inyakba nguogo. - Wati Longchar

Asen Aor sobusolemstü indang kodang jembidir, tekülem sabang nung Aor Tsüngkotep tola (Vest) semer noktakra konang bushir ama, temenen ama bilemer. Iba tangatetba nungi asenok pilatsüla. Pei kin sobutsüsa süaka yartsüngsang nung agiba sobutsütemjibo Khristan tekülem nung mapettsü südi. Iba dak alema mapang mapang nung pei kin sobusolemstü tim sobubaji kecha tai mali ta angateter. Asen Aor asoshi Ao Kin sobutsüji dang masü, iba kübok kidong sobutsüa lir, iba yagi shibaji shiba pa/la tali shisanga jangjatsür. Anungji ibai aseni wazüka ayutsüla.

**Kenten-menü:** Tanü asen tekülem nung temesüng nung kensü nung dang lokti ken teimba atener. Ya dang kotaker kensü ama asenoki bilemer. Asen sobaliba kensü yabo taaktsü ama bilemer. Kechiba? Asenok tangatetba makaba agi. Aor kensü ya-a asenok asoshi Tsüngremi agütsüba kensü ta meteta asen Aor kensü nung tekülem ken yanglua atentsü ajungshiteptsüla. Lanurtem karibo Ao kensüyim nung ken mejema tena tekülem nung shilem agiba ya kanga junger. Ano temaba jenjang nung iba kentenyim ajungkettsüla aser angazüktepba agi alimaia junger ta shitettsü.

**Tetseo Sisters-i** par sobaliba sobutsü sobur par kensü nung par kongki tema ken yanglua atenba agi Chakhesang sobaliba kanga ajungketsüogo, joko alima ajongai parnok sapur. Mizo nungeri parnok olasü nung par oshi agi ken atenba asenoki mangatetaka kanga anganer aser tenshir. Sürabangla asenokbo kechiba?

#### Benjongbentsü/amongtsümong

Onok college nung azünger kin ajak indang "festival" monga arur. Iba anogo nung shir among mongdir parnoki iba kin sobutsü sobur kanga dang mera keta parnoki tekülem sentep agi. Iba among nung iba among kechiba amonger aser tetsü-tebou sobaliba tajung kechisa lir itemji lemsatapa tangazükba tajung ngua among. Sentep temer benjong tenung nung parnoki chiyungtsü/süngo renema ibaji chia jema pelatep. - Narola Walling

Asen Aor sobaliba benjongmong aika rongnung tanü tashi benjong mongaka/memongaka aseni meteta alibaji Moatsü aser Tsüngremong ya lir. Tsüngremong nungdem nung iba ocet lemsatapa zülur asü nung iba benjong ana indang tera shisemdi.

**Moatsü:** Aor asoshi ibai benjong ya tulutiba lir. Küm shia alu puok arem aliba moapu kuma chitoker aji mapang shitak nung mi yoka rongtoker tsünusempongtsü aser tsük metsü yoker. Yamaji kodang metsü prokba/yokba mapa renemdir, iba metsüji mapang shitak moko meia teraksatsü ajak nungi kumzüka tsüksüngonsüng südakjang ta temoatsü meshiba benjong amonger, iba benjongmong dang Moatsü ta ajar. Akhidang yim kar nungbo ibai anogo tenetnü tashi yimer ajak metaseni among. Iba benjong atema jilia süngotsü, apokatsü ajak peria renemoka yur, yi tajungtiba sa-a yur, nashi/ak tepseta shijeb agütsütepa chia jema benjonga yar-tsüngsanga pelatepa among.

**Tsüngremong:** Iba benjong ya alurutsü mapang tonga aitdang, küm peyong timtem jenti agia inyaka arur, iba nungi temoatsü bendentsü asoshi Longtiütsüngba tsüngrem nem tenüngsang agütsüba den temoatsü meshiba among lir. Iba benjong among dang asemnü among taka ajar. Japu nungeri Unga taa ajar. Moatsümong ama yangia pei akaba tajungtiba lemsatapa chia jema among. Tsüngremong nung ki shia tsüngremi semdang aser idangji anemponga melira merenshir aser azükaru masür ta tsüraburtemi amanga Tsüngremong yabo Moatsümong dang nungi tali temejoba nung asüngteta anemponga among.

Benjongtem nung arr atsütepba, makamaiter yariba, yar-tsüngsang, tetongtechi metettepa akümba, lenpitsüla, meranga inyakba item dena lir. Item indangji rasaa mezülüka asen sobalibaren nung itemji keta aliba asenok ajaki meteta lir. Saka item benjongmong tajunga ta sür akhi yimya nung mongra asen Tsüngrem tsüngdang aibelener asütsü. Tanü asen lima Khristan lima kumogo. Khristan akümba agi sobaliba endoktsü tim masü. Nübortem rongnung telongjem, temeimtep, akangjungshitep, koda adokdaksür aser koba agi Tsüngrem sentsüwangshidaksür ta asüba nükjidong nung Yimden aser Arogoi lungjemer sentong tajung yanglua agitsüla. Itemji Khristan tamang tesayuba ajanga tarokba aser takangba kümdaksütsü asen tangatetba nungdaker.

Sobalibasa süaka kechi tamajung lir, tat. agi, yi ajemba aser kimakba, item endoktsüla. Akhidang süng lung tsüngrem dang temoatsü imla-a benjongmong amongbatem kasa temoatsü meshiba benjongji monga ajak teyanglur aser ajak moatsüsang tematiba Tsüngrem dang arenapu meshia benjong yanglua Tsüngrem külema among nung kanga ajungtsü.

Tanü reprangdangra sobaliba benjong dang masü saka Christmas/New Year benjong tashi nung longsolongben den aikati temesepba chiyungtsü amshiba angur aser alima longsolongben dang kümdaksür. Kinük kisang ajak nung washitepa amonger saka tekülem kidangibo marur ta asüba benjongmonger aika lir, iba yagi Khristan ayak samadaksür. Anungji tamanger lokti ama aibelen mesüi temeshiba nung asen sobaliba benjongjia amongtsü kanga tajangzük asütsü. Akhidang benjongbentsü mapang atenba ken asen Aor kensü nung tetezü tajungba yanglua atentsü kanga tapet asütsü.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# Pope Francis-i Slovakia linük nung Khristan lenirtem ajuru



September 13, 2021 nü Bratislava presidential palace nung Pope Francis agizük dang tangokba noksa nung angur. Kasa noksa nung Slovakia Tir, Zuzana Caputova-a angur.

**September 13, 2021:** Pope Francis-i Hungary linük nung 52buba International Eucharistic Congress sentong nung adenba sülen September 12 nü pa Slovakia tonga ao. Slovakia nung nütsüing million 5.4 lir, aser iba nungjagi nütsüing shilem 74 bo Catholic Khristanem lir. Hombarnü Bratislava International Airport nung Pope agizükba sülen pa Bratislava nung senden ka nung aden. Khristan kin 11 nungi lenirtem den senden ka amenba mapang nung Pope Francis-i Communist yimsüsüba kübok reshikangshiba putu bilemteta jembu. Senden tembangba sülen Pope-i Khristan lenir 53 den temeja senden ka amen. Francis-i anogo pezü tashi

Hungary aser Slovakia na semdang aser tanünübuba nung pai St. Martin cathedral-a semdanga liasü. Arrshi küm 84, Francis taküm July ita nungtu surgery agia dar inch 13 rangdokba sülen tang mezüing pai tanga linüktem semdang. Bratislava presidential palace nung Francis-i Slovakia Tir, Zuzana Caputova dang, tan putu nung coronavirus wara ya tetendangba tulutiba liasü, ajisüaka iba ya tarutsü atema tansütsü lesson ka südaktsüsüla, ta ashi. Hombarnü Francis Bratislava nung among aser nikong dang pai yimti nung aliba Holocaust memorial semdanga liasü. 1960s mapang Communist yimsüsürtemi

raksatsüba synagogue tesem nung iba memorial ya yanglua lir. Pope-i Khristanem aser Yihuda nungertem dang Europe nung Yihuda nung sempapa (antisemitism) nokdangtsü atema longjemer inyaksüla, ta ayongzüük. Akhidang Roman Catholic putir, Jozef Tiso linük Tir akümba sülen pa yimsüsüba kübok Yihuda nung anema oziing tesashi aika yanglu aser Yihuda nung 75,000 shi Nazi camps-i yoka parnok 68,000 shi tepseta liasü. Tiso nem tasüba temerenshi obendang agütsüba sülen 1947 küm tekong nung listi agi alenseta südaktsü. Tangbo Slovakia nung Yihuda nung 5,000 shi dang lir.

# US nung Khristan aikati Tanela Temeshi ya atangji, ta mamanger

**September 13, 2021:** America nung tain million 176 shi Khristan lir, saka iba nungjagi shilem 6 shi (million 15)-i dang Laishiba nung akhanga amanger, ta Arizona Christian University indang survey ka ajanga bushitet. Iba osang ya tawa Cultural Research Center of Arizona Christian University-i sayaba American Worldview Inventory nung adoktsüogo. Taküm February ita nung agiba survey nung America nung tain 2,000-i shilem agia liasü. America nung Evangelicals densema pei sasa Khristan ta sangdonger aikati Tsüingremji ajak takoksang, ajak meteta alisang aser anüing-ali ajak yanglusang, ta amanger, saka shilem 50 dak temaibo Tanela Temeshi densema Laishiba nung aliba tesayubatem aika mamanger/sendoker, ta kasa survey ajanga bushitet. Ano Khristan aikati, alima nung nisung tajung aika lir, aser

mapa tajung inyakba ajanga kodak ajanzükttetsü, ta aikati bilemer ta kasa survey ajanga metetdaksü. Cultural Research Center nungi research agir tongti, George Barna-i, "Khristan' ta asüba ya Yisu Khrista aroka bushiba mesüra Pa ama alitsü merangba masü saka nungja ka mesüra telok ka ama dang kümdaktsüogo," ta metetdaksü. Tanaben asoba Khristan aser evangelicals ama Khristan teloktemi Laishiba nung metsünga-reta amanger, ta kasa survey ajanga metetdaksü. "Ano pei sasa tanaben asoba Khristan, ta ashirtem shilem 62-ibo Tanela Temeshi ya atangji masü, saka Tsüingrem tashi indang temaitsü ka aser temeshi temaitsü ka ama dang züingshir. Ano shilem 61-ibo tamangba yimsü balala amanger ajakji kasa senti ta amanger; iba dak alia shilem 60-ibo na nisung tajung ka süra

mesüra nai mapa tajung aika inyaka lira kodak lenmang ajanzükttetsü ta amanger. Item ajungaji Laishiba tesayuba den mapet," ta kasa survey ajanga metetdaksü. Ano pei sasa Khristan ta ashir telok katibo Laishiba kanga metsünga reta amanger aser parnok dangji "Theological Born-again" ta ajar, ta Barna-i ashi. "American Worldview Inventory surveys ajanga, US nung Khristan nütsüing shilem 6-i dang Laishiba metsünga reta amanger. 'Integrated Disciples' ta asüba teloki aiterem jagi pei tamangji pai taküm yimya agi benshia sayur," ta Barna-i ashi. 'Integrated Disciples' nungi shilem 99-i Laishiba nung aliba ajakji shidak aser Tsüingrem O lir, ta amanger. Tsüingremi ajak meteta lir, Tsüingremi anüing-ali ajak yanglu aser tanü tashi Tsüingremi yimsüsür ta amanger," ta paisa metetdaksü.

# ANO GO ABEN TSÜNGREM DEN

## Arung aser ajiang

Aser parnoki pa dang ashi, Rabi... pai parnok dang ashi, Arung, aser nenoki angutsü. Anungji parnok aru aser Pa kechi nung ali angu aser panüji parnok Pa den ali. Yohan 1:38b-39

Asenok ajak dangi Khristan aini aoba otsü dang mejembitsü mapang ka arutsü. Iba indang dang jembiba jagi meperir. Asenoki aotsü apusotsüla! Khristan taküm nung sendakba indang asenoki ghonda aika agia jembitsü akok, saka asenoki shidakba Khrista sülen anidaktsü mapusora mapang intoka Khristan taküm nung sendakba indang dang jembiba jagi kecha masütsü!

Putu aika, Messia arutsü shisadanga liasü aser Israel kin ajanga shin. Yihuda nung rongnung Messia mapa yimya indang jembiba dang nungi tanga onük tali mejembi alitsü. Andriai Yohan Baptitsüba nungi Messia arutsü indang angashi. Tang aoksa Pa ngunüa aliba nisung den tejak o tejak na chitepa angu! Andriai asüngdangnüa aliba asüngdangtsü Pa mulung dangi aru. Andria den theological topic jembitsü melen Yisui meyipa aotsü tenzüük. Andriai asüngdangbaji O kisüing agi melangzüksü, saka len jajaba ajanga.

Khristan yimsüji angatetsü asoshi renema yuja aliba ka masü. Ibai nübu ka sülen anidakba lir. Yisu den jajadang Andriai Yisui shiranger anebtsüba, Tsüingrem shisatsü sayuba aser Tsüingrem ain sayuba Andriai angu. Andriai Tsüingrem indang dang angazük masü shidakba nung Pai Pa metetta aküm! Lemjem nung na ne Kibur den noktaksü mapang arutsü. Tasüngdangba ajak kazü dang nungi, Yisui ne dang ashi, "Ne tsüngsem semokang, lemanng jagi atokang aser Kü sülen anidakang." Na anogo shia Yisu den jajadang, Yisui ne tasüngdangbatem langzüksü aser nai asüngdangtsü metetta aliba dang nungi timba nai angutsü.

# Sept. 16-17 anogotem nung 6buba NBCA Pastors' Conference agitsü

**NAGAMESE BAPTIST CHURCHES ASSOCIATION**  
**6<sup>th</sup> Biennial Pastors' Conference 2021**  
 NBCA PASTORS' FELLOWSHIP  
 DIMAPUR : NAGALAND  
 ESTD 2014  
 SAVED TO SERVE  
 Theme : "A Vision of the Harvest" (Galatians 6:9)  
 Date : 16<sup>th</sup> & 17<sup>th</sup> September, 2021  
 Host : Nagamese Baptist Churches, Kohima Area  
 Venue : Zion Retreat Centre Sechü Zubza, Kohima  
 Copy to, \_\_\_\_\_  
 Rev/Dr/Mr/Mrs/Miss \_\_\_\_\_

**Kohima, Rongjui/September 13 (TYO):** General Secretary, Rev. Dr. Zelhoh Keyho aser NBCA Executive Secretary, Rev. Dr. R. Meren Jamir na asütsü. Iba dak alia Church Accountancy workshop nung shisalen sayurji anogotem nung Kohima yimti nung ayongzüka agitsü; "A vision of the harvest" (Galatia 6:9) omen nung ajemdaker iba Iba conference ya Zion Retreat Centre Sechü Zubza, Kohima nung agitsü aser iba mongdang tayongerji Nagaland Baptist Churches, Kohima area lir.

**OLONG PAITEP # 5936**

	1				2	3				
4			5							6
						7				
	8									
	9			10				11		
						12				13
14										
						15				
		16								

<b>TIPILEN</b>		<b>LANGTSÜNGLEN</b>	
2. Sü jeplok	- (4)	1. _____ i	- (4)
4. O agi merenshi	- (5)	3. Kasa masü	- (6)
7. Ayongküm li	- (5)	5. Nüchi masü	- (5)
8. Chiyungtsü mapang süiadok	- (4)	6. Tashi endok	- (5)
9. Tsüngrem den jembiba	- (9)	9. Langtem	- (5)
12. Saklok	- (4)	10. Anü malidang	- (6)
14. Samaba mebushitet	- (5)	11. _____ kibur	- (5)
15. Mejanga onü	- (5)	13. Tebur tembar tsüngda	- (4)
16. Tzü shiruru ka	- (4)	jatepba	- (4)

**OLONG PAITEP # 5935 TELANGZÜBA**

<b>TIPILEN :</b>		<b>LANGTSÜNGLEN :</b>	
1.Lemsa, 3. Osang, 5. Mezüng,		1. Lamén, 2. Sangken, 3. Omen,	
6. Agi, 7. Süra, 8. Tebutem,		4. Asüküm, 7. Sendong, 8. Tejang,	
9. Amen, 12. Odi, 13. Asayar,		10. Tanga, 11. Tazü.	
14. Angsü, 15. Agima.			



**NÜBENER TABU ALOKBA TIMTEM NUNG :**

*Alokba tanur tenet sor ti buba asodang tenüng ajatsü ratar.*

**Sobangba** : Temba, tanur talakbajia tenüng kechi jatsür?

**Alokba** : Haeet, joko tenünga jamar kechianga mepurarji Tatemliba ajar ako, tetezü tatemsaba ati.

**Sobangba** : Very good.  
(*Tesangküm jia tetsür chanu ka asor*)

**Sobangba** : Aree, temba Tatemliba sülen tobo joko masotsüang ta alinung ano ka aso?

**Alokba** : Ayayaya, temba, by mistake tanglokba ati.

**Sobangba** : Achha, süra tenünga shiba ajar jalaji?

**Alokba** : Joko kechianga majarji Anobenla ajar ati!

**Sobangba** : Wow, wonderful temba Alok!!

Lilir : WhatsApp

**TANÜBO NAI LANGZÜANG**

Q. Lord Krishna indang tesayurji shiba liasü?

A. Dronacharya                      B. Sandipani Muni  
C. Rishi Visishtha                  D. Garga Muni

(Taruba adok nung onoki langzütsü)

**YASHI ADOK TELANGZÜBA : Critically Endangered**

**AO OSHI ANGAZÜKDAK:**  
**TANÜ ANGAZÜKTSÜBA OJANG**

**Kümrem**  
(adv) kanga tajung ( extremely good)  
\* Lai takok tajung anguba angashia onok ajak *kümrem* pelar.

**Kümrem**  
(n) Nashi aser jang tepin nung aliba mesen ( parasites found in stomach of cows)  
\* Nashi tepin nung *kümrem* mesen alibaji jungjunga endoka shitoker achitsüla.

**NAI-A YA METETTER MA?**

**TETSÜR INTERNATIONAL FOOTBALL NUNG GOAL TIMBA IDAKJA ALIR ASAYARTEM:**

Tenüng	Linük	Goal
- Christine Sinclair	Canada	187
- Abby Wambach	United States	184
- Mia Hamm	United States	158
- Kristine Lilly	United States	130
- Birgit Prinz	Germany	128
- Carli Lloyd	United States	128
- Julie Fleeting	Scotland	116
- Marta	Brazil	112
- Alex Morgan	United States	111
- Patrizia Panico	Italy	107
- Elisabetta Vignotto	Italy	107
- Michelle Akers	United States	107
- Sun Wen	China PR	106
- Carolina Morace	Italy	105
- Portia Modise	South Africa	101
- Han Duan	China PR	101
- Tiffeny Milbrett	United States	100

**SUDOKU # 5977                      TELANGZUBA # 5976**

	2		6			4		3	8	1	4	6	2	9	5	7	
6	8	3	2	7				4	9	7	5	8	1	2	6	3	
		7	3		9	6		2	5	6	7	9	3	1	8	4	
3	6		4					9	7	5	6	2	8	3	4	1	
2			1		6	7	5	6	4	3	1	7	9	8	2	5	
	7			9	2		1	3	8	1	2	3	4	5	7	9	6
			9	6			8	7	2	4	8	3	6	5	1	9	
		5		4				1	6	9	2	5	7	4	3	8	
		6		2		4		5	3	8	9	1	4	6	7	2	

**OJANG LUTEP # 5522**

HIAC :

MTSAJEÜ :

TIJEN :

AKLIA :

ENTASZÜ :

DOKSENA :

KEINYAR :

GUBANA :

ÜJONGCHIYTSI :

NANTAGBA :

**OJANG LUTEP TELANGZÜBA # 5521**

**PEI SASA MERANGA ASER OCHISHIA INYAKER AJANGZÜKBATEM KANGA AGI TAJUNGBA**

**TAN HOPTA ATEMA - KOMA SÜLA ?**

Q. Jammu & Kashmir amato Nagaland state agi Union Territory-ang ana kümtsü nunga koma süla ?

# PM Modi-i Gujarat CM tasebba Patel nem tenüngsang agütsü



September 13, 2021 nü Raj Bhavan, Gandhinagar nung Gujarat Angh, Acharya Devvrat-i ketdangsüa Bhupendra Patel nem Chief Minister tenangzükba agidaktsüba noksa nung angur.

**New Delhi, Rongjui/ September 13 (Agencies):** Hombarnü Ato kilonser, Narendra Modi-i Gujarat Chief Minister tasebba, Bhupendra Patel nem tenüngsang agütsü, aser Patel yimsüsüba kübok state nung terenlok kanga alitsü ta amanger, ta metetdaksü. Hombarnü nü Raj Bhavan, Gandhinagar nung Gujarat Angh, Acharya Devvrat-i ketdangsüa Bhupendra Patel nem Chief Minister menden atema tenangzükba agidakja liasü. Modi-i ashiba agi, pai Patel metetba sülen küm aika jungogo aser Patel-i BJP nung dang masü saka yimsüsüba

tsütsü aser nübür tenzükba tsütsü tatishitsü tajung aika sayuogo. Modi-i twitter ajanga, "Gujarat CM tenangzükba agiba atema Bhupendra Bhai nem tenüngsang agütsü. Ni pa metetba sülen küm aika jungogo. Pai BJP Organisation nung dang masü saka administration aser nübür tenzükba tsütsü tatishitsü tajung aika sayuogo. Pa yimsüsüba kübok Gujarat nung terenlok kanga alitsü," ta metetdaksü. Taoba Chief Minister, Vijay Rupani nem tenüngsang agüja Modi-i twitter ajanga, "CM küm pongu inyakba mapang

nung Vijay Rupani-i nübürtem atema mapa tajung aika inyakogo. Pai loktiliba nung nübür ajak atema kanga meranga inyakogo. Tarutsü nunga maneni pai nübür tenzüksü ta ni amanger," ta metetdaksü. Chief minister tasebba, Bhupendra Patel ya tang mezüng MLA lir. Sangküm December ita nung Gujarat assembly election agütsü lia Honibarnü Vijay Rupai-i state Angh nem CM menden nungi anenba shidi agüja liasü aser Amongnü BJP legislature senden nung CM menden atema Patel shim.

# Pegasus ken o ya yimjak nung jembitsü ken o ka masü: Centre

**New Delhi, Rongjui/ September 13 (Agencies):** Pegasus ken o bushisüngdangtsü atema temepishiba kar agüja aliba dak sendakba nung Hombarnü Centre sorkari Supreme Court dang, sorkari affidavit nung osang tejangja magütsünener, kechiyong iba ken o ya yimjak nung jembitsü ken o ka masü, ta metetdaksü. Sorkar tenüng nung jembir, Solicitor General Tushar Mehta-i Chief Justice, N V Ramana-i aniba bench dang, "Onoki mimshitsüsa kecha mali, ibayongji sorkari item ken o repringshitsü atema mongintemi akümba committee ka tentetsü ta shiogo," ta metetdaksü. Tushar Mehta-isa, sorkari

software ka amshi asü masü, ta asüba onükji yimjak nung o lemteptsüsa onük ka masü, ta metetdaksü. Mehta-isa, mongintemi akümba committee report ji Supreme Court nem-a agütsütsü, ta ashi. Pegasus dak sendakba nung ano affidavit ka agüjang ta Supreme Court-i Centre dang tuyuba sülen court-i ano maneni sorkar nem mapang agütsüsemogo. Tamalen centre-i Supreme Court nem affidavit ka agüja liasü, aser Parliament nung Information Technology Minister Ashwini Vaishnav-i Pegasus dak sendakba sangdong ka agütsüogo, ta ashi. Tamalen Congress Party-ia

Pegasus ken o bushisüngdangtsü atema sorkari joint parliamentary committee ka tentetsüla mesüra iba ken o bushisüngdangtsü atema Supreme Court judge ka shimtsüla, ta takhangba agüja liasü. July ita nung International media-i, sorkar agencies dang ang ayokba Israel nung spyware ka amshia India nung nisung aika phone ajanga itangiter asütsüa akok; aser parnok rongnung tang teinyakdak minister ana, osangbener 40 dak tema, tongtibang opposition lenir asem, Supreme Court judge ka, shishilembartem aser India nung activist tem aika indang phone numbers densema lir, ta metetdakja liasü.



September 13, 2021 nü New Delhi kübok Sabji Madi area nung ki ka chirepba sülen NDRF aser police temi kümzükba maparen inyakba noksa nung angur.

# Congress lenir, Oscar Fernandes süogo

**New Delhi, September 13 (Agencies):** Hombarnü Congress lenir tain, Oscar Fernandes Karnataka nung aliba hospital ka nung süogo; pa arrshi küm 80 liasü. Taoba mapang Union Minister aser Rajya Sabha züngsem, Fernandes Mangalore nung aliba nija hospital ka nung süogo, ta par kinüngertemi metetdaksü.



July ita nung Fernandes par kidang yoga aiba mapang nung yiruba sülen hospital-i anir oa liasü aser tawa surgery agia tekolok nungi azü long indoka liasü. Pai kinüngtsü den tanur ana toktsür alima nungi pilaogo. Pa asüba sülen Ato kilonser, Narendra Modi-i twitter ajanga, "Rajya Sabha MP, Oscar Fernandes ajungbena asüba osang angashia jashir. Tang ama mangyim mapang nung ni par kinüngertem aser medemertem den mangyim jashi lemsateper aser sarasademtsür. Asür tanela tesünep nung anisüngzükang ta sarasademtsür," ta lemsatep. Congress lenir, Rahul Gandhi-i twitter ajanga, "Pa asüba ya ni asoshi takoksa tulu. Congress party nung onok aika atema pa ya len sayur ka liasü. Pa kanga menüngratsü aser pai inyakba mapatem bilemtetsü," ta metetdaksü.

lenir ka liasü aser pa yimtenren nung aliba mapang piyong party tangatetba nung akanga alir ka liasü. Oscar Fernandes ya Udupi constituency nungi Lok Sabha nung ponguben tashi MP inyak aser Rajya Sabha nunga pezüben tashi MP inyakogo. 1980 küm mezüng pai Lok Sabha election nung takok ngua liasü aser 1984, 1989, 1991, 1996 kümtem nunga kasa menden nungisa takok angu. 2006 küm nungi 2009 küm tashi pa Labour & Employment Union Minister inyak aser Manmohan Singh-i aniba UPA II sorkar nung NRI affairs aser Statistics & Programme Implementation densema menden balala nung inyaka liasü. 1996 küm pa All India Congress Committee (AICC) central election authority Chairman aser AICC general secretary inyaka liasü.

Oscar Fernandes ya Gandhi kibongi kanga melung lemtetba



September 13, 2021 nü Patiala nung Rural Labour Union züngsemtemi Mall road mokdang Punjab sorkar nem takhangba balala agüja longkak aitba noksa nung angur.

# UP election nung Cong-i Priyanka leniba nung tokteptsü: Salman Khurshid

**New Delhi, September 13 (Agencies):** Taoba mapang Union Minister, Salman Khurshid-i, taruba Uttar Pradesh assembly elections nung Congress party-i Priyanka Gandhi leniba nung tokteptsü saka tang tashi nungbo Chief Minister candidate meshim, ta metetdaksü. Paise, taruba UP election atema Congress-i tanga party den melokteptsü, ta metetdaksü. Congress general secretary, Priyanka Gandhi Vadra-i anogo pongu tashi Uttar Pradesh sülen Hombarnü Delhi-i ogo. Khurshid-i, "Ozü Party-i

tanga party den melokteptsü. Onok kijai elections nung tokteptsü. Constituency shia nung nübürtem timtem balala metettsü atema onoki constituency ajak sema senzütsü. Congress-i assembly menden 403 prongla nungi candidates shima tokteptsütsü," ta metetdaksü. UP election atema manifesto nungji nübürtem timtem ajak inoksemtsü, ta pai ashi. Nübürtem ajuruba sülen election manifesto renemtsü atema Khurshid Agra-i oa lir. Pa den Congress National otongdar, Supriya Shrinet aser tangartema liasü.

## N.Korea-i Long-range Cruise Missile ka tendangogo Qatar foreign minister-i Afghanistan semdang



**Seoul, Rongjui/September 13 (Agencies):** North Korea-i Hopta tatem long-range cruise missile tasen ka kanga takok ngua tendangogo, ta state media, KCNA sangdong ka ajanga Hombarnü metetdaksüogoo. Denuclearisation dak sendakba nung United States den ken o jembishinü bangdaker aliba mapang ka nung tang parnoki missile tasen ka tendangogo.

Honibar aser Deobarnü missile tendangba mapang iba missile ya km 1,500 (930 miles)

yima or parnoki yua aliba target tem dak kashi aser NK tzüym nung tsük, ta KCNA-isa metetdaksü.

March ita tactical short-range ballistic missile ka tendangba sülen North-i tang mezüngbuba missile ka tendangogo. North Korea-isa, January ita U.S. tir Joe Biden-i office mapa belenzükba sülen ghonda ishika dang lir cruise missile ka tendanga liasü.

United State-i North Korea nem tenokdangba balala agütsür aliba agintsü melena North

indang nuclear aser ballistic missile programme tem adongsatsü atema sensaksem bangdaker aliba mapang ka nung tang iba missile tendangba ajanga Pyongyang indang weapons programme tanem tanemi renlokyonga aoba sayur. Iba sensaksem ya 2019 küm nungi bangdaka lir.

Workers' Party' indang official osang kaket Rodong Sinmun-i, transporter-erector-launcher ka nungi long-range cruise missile tasenba khaket yokba aser yima aoba indang noksatem lemsatepogo.

Iba missile ya kanga tongtibang hadir ka, koba taoba küm ana tsüngda yangluogo aser January ita defence science aser arsenals terenlok asoshi küm pong atema sentong ya sangdongba nung tongtibang shilem ka lir, ta KCNA-i ashi.

Missile tendangba sentong nung North Korea lenir Kim Jong Un-i shilem magi. KCNA-i ashiba agi, Workers' Party' züngsem Pak Jong Chon aser central committee secretary kati iba inyakyim asadanga liasü.

North Korea den mangatetep aliba bentettsü atema United States, South Korea aser Japan nungi chief nuclear negotiator tem Tokyo nung ajuruteptsü lia tang iba missile tendangogo.

Kasa mapang nung China indang foreign minister, Wang Yi-i Mogolbarnü Seoul semdanga South indang foreign minister Chung Eui-yong den sensaksemtsü lir.



**Kabul, Rongjui/September 13 (Agencies):** Qatar foreign minister Sheikh Mohammed bin Abdulrahman Al-Thani-i Deobarnü Taliba-i shimba Ato Kilonser den ajurutepa sensaksemogo, ta Taliban otongdar kati ashi.

Qatar aser Taliban na tesendaktepa kanga junga lir ta züngshia arudar aser parnoki U.S-i lisopurtem aser tang linüktemi nungi nüburtem aser anüolen aliba linüktem nem teyari agütsüba Afghan nungertemi Kabul nungi aninba nung teyari tulu agütsüogoo.

Kasa mapang nung Qatar yimtiba Doha nung Taliban indang political office ka amenoka lir. Iba office yagi United States den sensaksem ajak achaayanga liasü aser iba sensaksem sülen US sepaitemi Afghanistan toktsüogoo.

## Malaysia Ato Kilonseri opposition teyari ngutetogo

**Kuala Lumpur, Rongjui/Sept. 13 (Agencies):** Office nung it aka shi amenba sülen Hombarnü Parliament tanaben lapokba mapang Malaysia indang lenir tasenbai opposition teyari ngutet anüksar aliba sorkar lungjemshir aser iba melen temelenshi kar benoker.

Ato kilonser Ismail Sabri Yaakob-i Hombarnü nikonngang Anwar Ibrahim-i aniba opposition bloc den amaliteptsü tezüngzüktep ka züluteptsü aser ibaji ajanga küm ana nung general election agitsü lia pa yimsüsüba anokshitsütsü merangba nungi nokdangtsü.

Iba tezüngzüktep yagi züngsem 222 aliba parliament nung züngsem 114-i pa nungitba den bendenloksema Anwar indang bloc nungi ozüng yanglur nisung 88-i Ismail nungittsü.

Telok telemsa melie amalitepba ajanga linük nung COVID-19 tashidak wara den raratsü aser rongsenketzüng tanaben shia arudaktsütsü asoshi yimten yimsüsüba nung mangatetep malitsü, ta sorkar aser Anwar indang alliance ajanga Deobarnü menur sangdong ka nung ashi. Parnoki yimsüsüba tsütsü tashi itshiba aser parliamentary temelenshi nung ranglokttsü, ta ashir.

Party yutsüba nungi kumzüksü asoshi ozüng tasen aser Ato Kilonser indang kümsük ya küm 10 tashi melenshitsü atema Ismail-i taoba hopta benokba sülen iba mera ya agir.

Pai tekeratiba nung voting age ka arishi küm 21 aliba 18 kumdahtsütsü, bill tasen atema telok telemsa makai renemtsü

Sheikh Mohammed-i Ato Kilonser Mullah Muhammad Hassan Akhund aser tanga tongtibang minister tem den ajurutepogo, ta otongdarisa ashi.

"Senden nung linük ana tsüngda tesendaktep, humanitarian teyari, rongsentetzüng nung terenlok aser alima den tesendaktep dak sendakba nung onük balala benoka sensaksemogo," ta Taliban otongdar Suhail Shaheen-i ashi.

Deobarnü senden amenba osang ya mezüng Al Jazeera television-i sangdonga liasü. Iba senden nung deputy Prime Minister Abdul Salam Hanafi, Foreign Minister Amir Khan Muttaqi, Defence Minister Yaqoob Mujahid, Interior Minister Sirajuddin Haqqani aser intelligence chief Abdul Haq Wasiq nungeria shilem agi.

Shaheen-i ashiba agi, Islamic Emirate lenirtemi Qatar sorkari Afghan nung nongita yariba atema dang kanga pelaba lemsatepogo.

Parnokisa, Doha nung United States aser Taliban na tsüngda tenangzüktepba yangluba ya otsüsütsüka aser telok ajaki iba sülen anidaktsüla, ta ashi.

## Suu Kyi temang majungbayong ken o jembidak shilem magitet

**Naypyitaw, Rongjui/Sept. 13 (Agencies):** Myanmar lenir menden nungi atsüngdoker alila Aung San Suu Kyi indang okatsürtemi ashiba agi, la temang majungbayong ken o jembidak shilem magitet.

Ozüng alema bendang lima nungi walkie-talkie bener arua amshiba aser 2020 election nübuyim mapang COVID-19 ozüng nung aibelenba densema arishi küm 76 tain, Suu Kyi anema ken o aika benoka lir.

July ita linük tesem ajungalen coronavirus tashidak prokshiba mechi la anema benoka aliba ken o jembitsü aliba thinenba sülen Hombarnü ya mezüngbuba liasü.

Aung San Suu Kyi-i lar legal team den Hombarnep senden tatsüka amenba sülen la house arrest süa aliba tesemi meyipa ao, ta lawyer Min Min Soe-i osangbener dang ashi.

"Kanga mejungi shirangerbo masü. La dak car sickness lir. Lai yamaji sür menokdakteter aser onok dang la anisüngzükner ta ashi," ta Min Min Soe-i ashi.

Ano la indang okatsür Khin

Maung Zaw-i The Associated Press dang ashiba agi, ken o jembidak dena alir ajunga Deobarnü COVID-19 tendanga liasü. Aung San Suu Kyi ya COVID-19 mozü agia lir.

Aung San Suu Kyi neptzü ayimer aser gari nung kanga akoshiba ajanga la mangmanga liasü. Anungji onoki court dang tanü indang appointment thinenttsü asüngdang, ta pai ashi.

Aung San Suu Kyi ya mitkartemi February ita atsüngdok aser iba yongji nüburtemi linük yimsüsür anema nokdak. Taoba küm Aung San Suu Kyi'er National League for Democracy (NLD) teloki takok anguba November election nung ashikülak mapa inyaka lir, ta mitkartemi ashir. NLD ajanga item mapa meinyak ta ashir aser election repranga asadanger temia taittsüba ya tamendak dak maka ta ashir.

Nobel Peace sempet ngur alila ya mitkartemi sorkar atsüngdokba anepdang apu aser lar okatsürtem ajanga

dang alima den osang agitepteter, saka la den ajurutepa jembishinüba ajunga ketdangsurtemi mita repranger, ta ashir.

La anema okadak ken o jembiba nung osangbener marudaktsür, aser la ya ano yimsüsür anema nokdaksüsa o jembiba, ozüng alema hon agiba aser colonial mapang yangluba secrecy law nung aibelenba nunga tai tonglokja lir. La ya aitsüra küm 14 tashi tepuokdak ayutsü.

Saka item taittsüba ajanga lar okatsürtemi magizüker.

Min Min Soe-i osangbener dang ashiba agi, Aung San Suu Kyi den külemi apusang aser taoba tir Win Myint anema Hombarnü kuli agütsü.

2020 election nübuyim mapang Win Myint-ia COVID-19 tenokdangba ozüngtem nung aibelen ta prosecution witness kati kuli agütsü, ta lai ashi.

Tenaprongi coronavirus tenokdangba nung aibelenba ken o ya September 20 sülen jembitsü lemtet aser danga ken o tem Mongulbarnüa maneni jembitsü, ta okatsüri ashi.

## Wokha nung District Level Workshop agiogo

**Wokha, Rongjui/September 13, 2021 (TYO):** Hombarnü, DC Conference Hall kübok "Building Capacities for Taking Forward the SDGs" nung ajemdaker District Level Workshop ayonga agiogo. Iba sentong nung District Planning Officer, P.Nchumbemo Kikon menden liasü, ta sangdong ajanga metetdaksü.

Iba District Level Workshop sentong nung Deputy Commissioner, Wokha, Orenthung Lotha, Superintendent of Police Menangmeren aser district-level department nungi ketdangsürtem aruagi denogo.

Deputy Commissioner, Orenthung-i jembiba mapang pai Sustainable Development Goals (SDGs) indang telok dang metetpeladaksü aser terenlok lidaksütsü asoshi külem sendaktepa alir ajak longjemer meranga inyaksüla. Alima tesem ajunga nung tzu mopung melenshia aoba ajanga timtem adokdaksür, kong nisung taküm samadaksür aser meimchir nem takoksa bener arutsür, anungji temelenshi adokdaksütsü asoshi asenok longjemer inyaksü nungdaker, ta pai ashi.

DC-isa, alima nung tzu mopung melenshia aoba ya meimchir mekümdangba, tzu mopung lendong nokdangtsü asoshi maparen timi achaayang masüba aser asen meküta aliba libajen mapayuba ajanga adoker, ta metetdaksü.

Tzu mopung melenshia aoba ajanga alima tesem ajunga aser Wokha district nung timtem adokdaksüba indang pai telok dang metetdaksü. Tatishitsü

agi, iba district nung tsüngsarusa/tzünglu peria maruba tensa ajanga aluyimer aika rokongba/timtemba; aser aji tanga kecha agia masü, saka meimchir mekümdangba ajanga lir, ta pai ashi.

Alima kümzüka ayutsü, meimchir tsüngda makamaitba timtem melidaksütsü aser 2030 küm tashi nungbo meimchirtem yimji-yimjung nung jangratema lidaksütsü nükla yur, 2015 küm United Nation nung züngsem ajungai SDG agizükogo, ta DC-i metetdaksü.

SDGs nung alima ajunga asoshi nükjidong 17 dena lir aser iba den külemi nükjidong 169 shi sendaktepa lir, koba tarutsü tajungba asoshi aser ajak ajangzüksü asoshi atongtetba asalentong ka asütsü.

Tang tagidak aliba sentong talisa Poshan Maa, koba tan ita piyong agitsü terenemba lir, iba sentong ajanga tanurtem rongnung 'malnutrition' aser 'anemia' ajemdaksütsü asoshi kanga yaritsü. Iba den külemi, Department tem indang yimiyim talisa Water Resource pur 'Catch the rains where it falls' yimiyim ya SDGs kübok aiter, ta pai ashi.

Lipüküm aser asen meküta aliba libajen kümzüka ayutsü terenlok maparen tsütsü SDGs indang nükjidong ajangzükdaksütsü asoshi department ajaki asalentong yanglua aser mapa kuma inyaksüla, ta pai Department ajak ayongzük.

Iba workshop shilem ama, SDG Officer, SDG Coordination Centre, Planning & Coordination Department, Abilo Humtsoe-i mezüng

technical session achaayanga agia liasü, kong Wokha district nung rangloker SDG mapa kuma inyaka aotsü indang nung lai jembiba.

Abilo-i, SDG mapa kuma inyaksü atema, national, state aser district level institutional mechanism aser asalentong, SDGs asadangshitsü atema District Indicator Framework aser iba mapatong tejakleni bener aotsü indang lemsatepa liasü.

Item asalentong takok ngua inyaksü asoshi Wokha district nung temelenshi alitsü nungdaker, ta metetdaksü.

SDG Officer, SDG Coordination Centre, Planning & Coordination Department, Phyobemo Lotha-i Interactive Session ketdangtsü agia liasü. Iba session nung, tongtibang tesemtem jangjatetsü aser Wokha District kübok tesendaktep department ajak atema telemtetba agitsü asoshi telok sensaksemogo.

Iba Workshop sentong tembanga District Planning Officer-i tepela anküp o jembiba, kong tarutsü asoshi district nung terenlok lidaksütsü atema SDGs ajanga maparen ajak takok ngua tejakleni bener aotsü tongtibangtem metetdaksü.

Maneni, SDGs mapatong tejakleni bener aotsü asoshi, kasa anogo district level workshop sentong ya Kiphire, Noklak, Tuensang, Longleng, Mokochung aser Zunheboto district tem nung agiogo. SDG mapa kuma inyaksü asoshi, item district nung kasa asalentongtem yangluogo, ta sangdong nung shia lir.

## Happy Birthday

TENÜNG : Aosenla Aier

Tasoba Anogo : September 14

Küm : 2

Tsüngremi Aosen küm ana tashi Pa temoatsü ma nung len anir aruba atema tenüngsang agütsür. Maneni la nem taküm tajung aser arishi talang moajang ta onoki sarasadema moatsür.

- Na meimertem



## Office of the TULI TOWN WARD UNION

Tuli Town - 798618  
Dist. Mokochung : Nagaland

### TULI TOWN WARD YIMDENI AYIMOKTSÜR

12<sup>th</sup> Sept. 2021 anogo Tuli Town nung nisung kari linük tenzüker tenüng amer rakzük-raktem mapa Tuli Town nung Tokan (Shop) nung sen meshia senzüba aser senji magütsüra taküm samatsütsü ta amokmerenba angashia, yimdeni item nisungtem pua bener arua statement agi, koba Social-media nung prokshidaki (Viral) Tuli Town Ward Union-i tatem tashi bushitsü aser lemtet nung aliba amai senchi Rs. 50,000/- (Rupees Fifty Thousand) only achitsü aser temerenshi tulu agütsütsü. Anungji shir ket nungsa iba rakzükraakteremtem statement agiba video aser voice recording lir ajaki indokang (delete). Iba mapa ya Tuli Town kümzüka ayutsü nükjidong nung yimdeni inyakba lir, tarutsü nunga Tuli Town nung rakzükraakterem matokdaksütsü asoshi tatem tashi inyaksü ta Tuli Town Ward yimden ajanga ayimoktsür.

Sd/-  
T. Nukshi Yaden  
Chairman, T.T.W.U

  
Aomeran  
Secretary, T.T.W.U

## SAMAR BUSHIR PROVISIONAL LAND PATTA

Shri. Bendangyanger

s/o Imtikumba of Mongsenyimti village

Patta No: 254, at Aoyimkum village. Tesazük: 108 x 60 ft.

## Mon DPDB senden agiogo



Mon, Rongjui/September 13, 2021: Deputy Commissioner Office, Mon indang Conference Room nung, DC Thavaseelan K, IAS-i anir District Planning & Development Board (DPDB) senden agiba mapang tangokba noksa ka yangi angur.

**Mon, Rongjui/September 13, 2021 (TYO):** Hombarnü, Ketdangpurtem tanaben Mon Deputy Commissioner, Conference Room nung, DC Thavaseelan K, IAS-i anir District Planning and Development Board senden ayonga agiogo, ta sangdong ajanga metetdaksü.

Iba senden nung, Board indang züngsem tasen - Additional Superintendent of Police Mon, T. Ado Yanlem aser Assistant Sericulture Officer, Keneizetuo Khro na telok dang metetpeladaksü.

Mon DPDB-i teküboklen agüja aliba asalentongtem tim Department dangi benoktsü asoshi bangiemtep.

i) Semi-Intensive Mithun Rearing Farm lapoktsü asoshi Nyahnyu yimtsüng shimtsü.

ii) Tizit nung Sub-Division Veterinary Office (SDVD) yanglutsü.

Kasa senden nung, Board-

isa Officer's Club Mon Ketdangpurtem tanaben shimtsü asoshi olemtepa liasü aser iba maparen atema ADC Mon, Chingak Konyak, NCS aser Addl. SP Mon, T. Ado Yanlem, NPS nati anir committee ka tentetsüogo.

SDO (C) Angjanyang, Yanithung Ngullie, NCS-i Board dang, State nung facility talisa Badminton atema Indoor Stadium aser Table Tennis, Snooker, Carrom, Gym, Lounge, Mini Library aliba District Club rongnung Officer's Club Mon asütsü, ta metetdaksü.

Officer tsüngda pei pei tebilemba lemsateptsü aser tesendaktep alitsü asoshi iba club nung züngsemtemi shilem tajung agitsüla, ta pai ajungshia liasü.

Iba senden nung, District indang Department nungi tekolakpurtem aser ketdangsurtem denogo, ta kasa sangdong ajanga metetdaksü.

## ZGCSU-i 41buba Freshers Social 2021 mungogo



Zunheboto, Rongjui/September 13, 2021: Zunheboto Government College nung 41buba Freshers Social 2021 sentong agiba mapang, Deputy Commissioner, Peter Lichamo-i telok den jembiba noksa nung angur.

**Zunheboto, Rongjui/September 13, 2021 (TYO):** Honibarnü (11.09.2021) Zunheboto Government College-i 'Embrace a new perspective' omen nung ajemdaker 41buba Freshers Social 2021 ayonga agiogo. Iba sentong college auditorium nung agia liasü, ta sangdong ajanga metetdaksü.

Iba sentong nung Deputy

Commissioner Zunheboto, Peter Lichamo tetushi tesemdanger ama aruagi denogo.

DC-i kaketshirtem dang pei taküm nung ajangshiba tongtibangtem jangjatetsü aser asadangshitsü asoshi ayongzük. Iba sentong takok ngua ayongzükba asoshi pai ZGCSU nem tenüngsang agütsü.

Iba sentong tetenzüklen, College Administration tenüng nung, V/Principal, Jekugha Sumi-i jembiba liasü. Freshers' pageant dak alia, iba sentong nung kaketshir aser tesayur temi sentong balala agia telok saksalemdaksü. Kughaka N Jakha aser Kivini H Kinimi nati Mr Fresher's aser Miss Fresher's jenjang angu, ta kasa sangdong nung shia lir.

## Root & Richardson nati ICC Players of the Month naroküm agizükogo



**Rongjui/September 13, 2021 (Agencies):** Tawa India den Test asayamung nung kanga takok ngua asayaba sülen England captain Joe Root-i India nunger pacer Jasprit Bumrah aser Pakistan nunger asayar Shaheen Afridi na ajateta, August ita atema International Cricket Council's Player of the Month naroküm agizükogo.

Tetsürtem rongnung Ireland tsür all-rounder Eimear Richardson-i iba naroküm agizüka liasü.

Root-i August ita India den test asaya asem nung run 507 yanglu, kong pai century asem yanglu aser batsmen tem rongnung Test Rankings nung temaba jenjang tongteta liasü.

"Captain ka ama pa dak nungi imlaba aser khuret bener pai batting nung tejakda ser team ania number one ranked Test batter akümba ngua ni kanga temulung süogo," ta taoba mapang South Africa nunger all-rounder aser ICC Voting

Academy züngsem JP Duminy-i ashi.

Kasa mapang nung Richardson-i lar teammate Gaby Lewis aser Thailand tsür Nattaya Boochatham na ajateta iba naroküm nguogo.

Richardson-i taoba ita tetsür T20 World Cup Europe Qualifier nung lenla ajak nung kanga junga asayaba sülen la nem Player of the Tournament agüja liasü.

Lai iba asayamung nung wicket tenet agi, kong Germany den asayaba mapang run 6 agütsür wicket 2 agiba aser Scotland den asayaba mapang run 24 agütsür wicket 2 agiba densema lir.

Laisa, France den asayaba mapang run ka danga magütsü wicket 2 agi aser Netherlands den asayaba mapang run 22 agütsür wicket 1 agi. Iba asayamung nung Ireland parnok telok nung tanabuba jenjang nung tembang.

Lai bowling nung teyar agütsüba dang masü saka batting

## Pakistan-i Hayden & Philander na coach asütsü shimogo

**Lahore, Rongjui/September 13 (Agencies):** Taoba Australia nunger Test opener Matthew Hayden aser taoba South Africa nunger pacer Vernon Philander na taruba ICC T20 World Cup atema Pakistan team coach asütsü shimogo, ta board-i Hombarnü metetdaksü.

Tena shimba osang ya Pakistan Cricket Board (PCB) chairman tasenba Ramiz Raja-i sangdonga liasü.

Head coach Misbah-ul-Haq aser bowling coach Waqar Younis nati küm ana inyaker tena mapa toktsüba sülen hopta ka dang lir Hayden aser Philander na shimogo.

"Pakistan team dang lenmang tasen sayutsü nüngdaker. Onoki World Cup atema Hayden aser Philander na shimogo," ta Raja-i osangbenertem den

sensaksemba mapang ashi.

"Onok nükjidongji iba team nem takokba tashi teyari agütsütsü asoshi lir, ajita asünungdang parnok asayaba yimya tajungba akümtsü," ta pai ashi.

PCB-i, New Zealand den kidang asayatsü aliba asayamung atema Taoba Test spinner Saqlain Mushtaq aser all-rounder Abdul Razzaq na interim coach asütsü shimba sangdongogo.

Misbah aser Waqar nati tenangzüktepba yanglur aliba küm ka anunga lia mapa toktsü.

Pakistan-i taoba mapanga bendanger coach aika shimogo, kong Richard Pybus, Bob Woolmer, Geoff Lawson, Dav Whatmore aser Mickey Arthur nunger densema lir, ajisüaka imlaba ama takok monguteti liasü.

nunga teyari tulu agüja liasü. Netherlands den final asayaba mapang lai ball 49 nung run 55 yanglu aser ajak senteper asayamung tepeyong nung run 76 yanglua liasü.

Richardson asayaba yimya dak kanga temulung asüba ICC Voting Academy nungi Zimbabwe nunger asayar Pommie Mbangwa-i lemsatapa liasü.

"Team ajaki kanga toktepa asayaba asayatem nung mejeta junga asayaba asayar nüngdaker aser Eimear-i mapang shidak nung bat aser ball ajanga team nem teyari agütsüogo," ta pai ashi.

## Jamshedpur FC-i midfielder Greg Stewart anisemogo

**Rongjui/September 13, 2021 (Agencies):** Indian Super League club Jamshedpur FC-i, taruba ISL atema Scottish midfielder Greg Stewart anisemogo.

Stewart ya Scottish Premiership champion ka lir, shiba 2020-21 season nung Scottish top division title akokba team Rangers nung densema liasü, ta club-i Deobarnü metetdaksü.

Rangers' pur, Liverpool legend Steven Gerrard lenisüba nung takok tulu ngua asayaa liasü.

"Season tasenba atema yongyaa atar. Iba ya ni asoshi tajangshiba tasen ka asütsü aser kanga yongyaa atar. Owen Coyle kübok inyaksü jangrademtsüka asütsü aser Jamshedpur nem takok agütsütsü asoshi takokba tashi asayatsü. Ni asayatsü matateter," ta Stewart-i ashi.

Scottish legacy club nung season ana masaya tsüngda arishi küm 31 tain asayar ya Scotland aser England nung club balala nung asayaogo.

Pai tang tashi nung club balala nungi 355 ben asayaogo.

Kasa mapang nung Jamshedpur FC head coach Owen Coyle-i ashiba agi,



"attack süa asayaba team ka tentettsü atema onoki shishilembadak versatile aser creative midfielder ka bushia liasü. Greg ya onok aososhi tetemsü asütsü. Pa UK nung league tulutem nung asayaba tajangshibatam bener arutsü."

"Pa Glasgow nung team tulutiba ka nungi asayatsü atema maongka nguogo anungji iba ajanga pa tashi sayur," ta paisa ashi.

Stewart mezüng Scottish Championship nung Cowdenbeath nungi asayaa tenzü, kong pa season pezü asaya. Iba sülen pa Dundee FC-i oa Scottish Premiership nung season asem asaya.

Maneni pa English club Birmingham City nungia asaya. Birmingham nung pa mapang tembangab sülen pa Rangers-i ao.

## Medvedev-i Djokovic tsükdakja US Open kokogo



**New York, Rongjui/September 13 (Agencies):** Deobarnü US Open tebur kija asaya final nung Daniil Medvedev-i 6-4, 6-4, 6-4 agi Novak Djokovic kokogo. 1969 küm sülen tang mezüngbuba küm ka nung Slam pezü prongla akoktsü atema Djokovic asoshi maongka liasü saka iba mongka ya Medvedev-i agintsüogo.

Kasa mapang nung Medvedev-i tang mezüngbuba Grand Slam ka koktetogo aser Djokovic-i Grand Slam 21buba kokteta otsü tasen ka yanglutsü aliba nokdangogo.

Final masaya tsüngda temaba jenjang nung aliba asayar Djokovic-i 2021 küm asayamung tongtibangtiba pezü nung khen danga tamakok mongui asaya 27 koker liasü. Pa iba asayamung

metenzük dang nungi otsü tasen ana yanglutsü atema maongka aliba pressure bener asayaa liasü.

Pai February ita Australian Open final nung Medvedev akok aser June ita French Open aser July ita Wimbledon dena koker liasü.

Ajisüaka arishi küm 34 tain asayar yagi final asaya nung junga masayateti liasü. Asaya nung pai unforced errors 38 mena. Pai Medvedev indang serve kabo break asü saka menoatoker liasü. Asaya nung pai junga masayateba agi tezü atangba nguogo aser pai pa indang racket-a raksaa liasü aser iba atema chair umpire-i

code violation ka agütsü.

Kasa mapang nung World No. 2 asayar Medvedev-i ball ajak arishia agizüka asayaba den service-a aibelen mesüi kang junga oteta liasü.

Djokovic-i iba asaya akok asübo Roger Federer aser Rafael Nadal na ajateta Slam 21buba kokteter otsü tasen ka yanglula, saka tang parnok asemprongla jenjang kasa nung lir.

Teburtem rongnungi tennis asaya nung küm ka nung Slam pezüprongla ya Rod Laver-i dang 1962 aser 1969 küm kokteta lir aser tetsürtem rongnungi Steffi Graf-i 1988 küm kokteta lir.

### BILEMDANGANG

"Tangar kati na ajungmesotsü akok, saka inyaksü atemabo nai mulungtettsüla."